

welches denn auch geschehen / daß die Jünger des HERN freylich viel Frucht gebracht / vnd ihr Ampt mit grossem Nus geführt haben / denn da haben sich viel tausend Seelen durch ihr Ampt bekehren / vnd zu der göttlichen Evangelischen Lehr leiten lassen / wie wir lesen von S. Petro / daß auff eine Predigt / vnd auff einem Tage / bey 3000. Seelen sich zu der Schaar der Gläubigen gethan haben / in Geschichten der Apostel am 2. Capitel Ein andermal / da Petrus predigte / wurden abermal ihrer viel / die dem Wort zuhöreten gläubig / vnd wird die Zahl der Männer / bey fünff tausend / wie gelesen wird Act. 5. Capitel. Wie sie nun viel Frucht gebracht prædicando, mit predigen / also haben sie es auch gethan miracula operando, mit verrichtung der Wunderwerck / daß sie Krancke gesund / ja da sie Todte gar lebendig gemachet / wie wir lesen in Geschichten der Apostel am 3. vnd am 9. Capitel. Viel Frucht brachten sie noch für der Himmelfahrt des HERN / wie sie dann zu ihm kamen / vnd die Zeitung brachten / HERN / es sind vns auch die Teuffel vnterthan in deinem Namen / Luc 10. Cap. Das ist eins / so der HERN erfordert / das bey trewen Lehrern seyn solle / nemlichen / copiosa fructificatio, das Bringen vieler Früchte / daß sie / wo nicht alle mit dem Namen / jedoch im Werck / vnd in der That / Polycarpi, vnd viel Fruchtbringer seyn sollen.

Das Ander so der HERN begehret / ist vnd heisset Ad discipulatum Christi consecratio, Trewe Lehrer sollen sich dahin ergeben / daß sie des HERN Jesu Christi Jünger seyn vnd werden: Efficiamini mei discipuli, Daß ihr meine Jünger werdet / wie es in der Lateinischen Bibel lautet / *16. Mat. 23* oder Discipuli heissen solche Jünger / die da begierig seyn zu lernen / die sich lehren vnd vnterrichten lassen / die sich nicht schämen des HERN Jesu Christi Schüler zu seyn / weil Gott der himliche